



Saopćenje za javnost povodom završetka finansijske revizije institucija BiH za 2018. godinu

Sarajevo, 1.8.2019.

Ured za reviziju institucija BiH završio je ciklus finansijskih revizija za institucije BiH za 2018. godinu. Revidirane su 74 institucije.

Ured za reviziju vodiče i metodologiju koju primjenjuje zasniva na Okviru standarda Međunarodne organizacije vrhovnih revizionih institucija te u izvještajima o finansijskoj reviziji daje dva odvojena mišljenja – pri čemu se prvo odnosi na tačnost, odnosno fer prikaz i istinitost finansijskih izvještaja, dok se drugo mišljenje odnosi na usklađenost aktivnosti, finansijskih transakcija i informacija institucija sa zakonima i drugim propisima kojima su iste regulisane.

Od revidirane 74 institucije, Ured za reviziju je za njih **šest** dao mišljenja s rezervom (dva mišljenja sa rezervom i četiri sa rezervom i skretanjem pažnje) - pri čemu su **tri** institucije dobile mišljenje s rezervom na usklađenost sa zakonima i propisima, **jedna** institucija na finansijske izvještaje, te **dvije** institucije i na usklađenost i na finansijske izvještaje - **55** pozitivnih mišljenja uz skretanje pažnje te **12** čisto pozitivnih mišljenja. U jednom slučaju, uslijed ograničenosti obima revizije, Ured se suzdržao od davanja mišljenja.

Ukupno izvršenje budžeta revidiranih institucija za 2018. godinu iznosilo je **935.014.410 KM**.

Opširnije informacije te kompletni izvještaji finansijske i revizije učinka dostupni su na web stranici Ureda za reviziju institucija BiH www.revizija.gov.ba.

URED ZA REVIZIJU INSTITUCIJA BIH




FINANSIJSKA REVIZIJA INSTITUCIJA BOSNE I HERCEGOVINE ZA 2018. GODINU



935.014.410 KM

ukupno izvršenje budžeta revidiranih institucija za 2018. godinu



OSNOVE ZA IZRAŽAVANJE MIŠLJENJA S REZERVOM NA FINANSIJSKE IZVJEŠTAJE I/ILI USKLAĐENOST POSLOVANJA INSTITUCIJA BIH ZA 2018. GODINU

Jedinica za implementaciju projekta izgradnje Zavoda za izvršenje krivičnih sankcija, pritvora i drugih mjera BiH

- Nadzorni odbor Zavoda nije imenovan i nije funkcionisao u 2018. godini te samim tim nije izvršena kontrola finansijskih poslova, niti je izvještaj o tome predložen Ministarstvu pravde BiH i Vijeću ministara BiH;
- Problematika tehničkog prijema je prouzrokovala dodatno kašnjenje u realizaciji Projekta izgradnje Državnog zatvora. Vijeće ministara BiH nije donijelo Odluku o početku rada Zavoda te roku za imenovanje rukovodioca budućeg Zavoda niti je, nakon izvršenog tehničkog prijema objekta Zavoda, donijelo odluke o prestanku rada Jedinice, Upravnog odbora i Nadzornog odbora, kako je to propisano Zakonom o izmjenama i dopunama Zakona o osnivanju Zavoda za izvršenje krivičnih sankcija, pritvora i drugih mjera BiH.

Direkcija za evropske integracije

- Direkcija je interno i eksterno premjestila državne službenike u periodu trajanja probnog rada, a za popunjavanje upražnjenih radnih mjesta nakon premještanja aktivirala je rezervnu listu uspješnih kandidata i na taj način na raspisani konkurs za tri radna mjesta primila osam državnih službenika, s tim da je dva državna službenika nakon samo tri mjeseca eksterno premjestila u drugu instituciju.

Ministarstvo vanjskih poslova BiH

- Ministarstvo je vršilo interne premještanje, unaprjeđenja i eksterne premještanje državnih službenika u periodu probnog rada što je za posljedicu imalo aktiviranje rezervnih listi uspješnih kandidata.
- Uslijed utvrđenih nedostataka pri popisu sredstava i obaveza, nismo bili u mogućnosti potvrditi tačnost bilansnih pozicija u dijelu potraživanja, obaveza i stalnih sredstava Ministarstva.

Ministarstvo odbrane BiH

- Dio pokretne perspektivne vojne imovine nije vrijednosno evidentiran u poslovne knjige Ministarstva, s obzirom da proces procjene imovine još uvijek nije završen, što direktno utiče na tačnost iskazan bilansnih pozicija.

Institut za akreditiranje BiH

- Kratkoročna potraživanja po osnovu obavljenih usluga iskazana u glavnoj knjizi Instituta ne slažu se sa pomoćnom evidencijom potraživanja, a prema evidencijama kod kupaca postoje značajna odstupanja u odnosu na stanje iskazano kod Instituta; prilikom godišnjeg popisa potraživanja Institut nije popisao pojedinačne nenaplaćene stavke potraživanja koje čine saldo ukupnih potraživanja.

Služba za poslove sa strancima

- Služba je izvršila interne premještanje državnih službenika u toku probnog rada, a tako upražnjena radna mjesta popunila aktiviranjem rezervne liste uspješnih kandidata.
- U zabilješkama uz finansijske izvještaje Služba nije konstatovala da postoje razlike između prihoda iskazanih u godišnjem izvještaju (Glavnoj knjizi) i pomoćnoj evidenciji Službe; Služba ne vrši mjesečno sravnjenje prihoda iz pomoćne evidencije sa prihodima iz Glavne knjige, pa nisu navedena obrazloženja za razliku između značajno većeg iznosa naplaćenih prihoda u odnosu na stanje iz pomoćnih evidencija.